

**Naalakkersuisut qulakkeerinninnissaat pillugu Inatsisartuni aalajangiiffigisassatut, inuusuttut 25-t inorlugit ukiullit tamarmik suliffissaannik, piginnaanngorsarnissaannut imaluunniit ilinniagaqarnissamik neqeroorfigineqarnissaannik siunnersuut.**

(Inatsisartunut ilaasortat, Akitsinnguaq Olsen aamma Kim Kielsen, Siumut)

**Akissuteqaat**

(Inuusutissarsiornermut Aatsitassanullu Naalakkersuisoq)

**Siullermeerneqarnera**

Ullumikkut Naalakkersuisut inuusuttut 25-t inorlugit ukiullit suliffeqalernissaannik pilersaaruteqanngillat, aamma qulakkeerinnissutaasumik pikkorissaqqiffeqartussaannermik imaluunniit ilinniagaqarnissamut neqeroorfigineqartussaannermik qulakkeerinninnermik atulersitsinissamik pilersaaruteqanngillat.

Pingaarnerpaamik Naalakkersuisuni inuusuttunut 25-t inorlugit ukioqartunut periuseraarput kissaatigigatsigu pikkorinnerulersittariaqartut ilinniartitaallutillu inuiaqatigiinni atorfinnik inuttaqanngitsunik tigusinissaminnut piareersimareerlutik. Nunami maani inuit ilinniagaqarsimasut inuusutissarsiutini immikkoortoqarfinni tamarluinnangajanni amigaataapput. Tamannarpiaq pequtigalugu Naalakkersuisut ilinniartitaaneq immikkut ukkatariuarparpaat.

Naalakkersuisut isumaqatigaat inuusuttut meeqqat atuarfianniit ilinniartitaanermut suliffeqarnermullu ikaarsaariartarnerat immikkut ittumik eqeersimaarfigineqarlunilu suliarineqartassasoq. Tassunga atatillugu Naalakkersuisut paasitissutigerusuppaat pineqartut pillugit nutaanik suliniutinik arlaqartunik peqalersussaanera:

Siullermik Naalakkersuisut kommuunit suleqatigalugit suleriuseq aallartippaat 15-18-inut ukiullit meeqqat atuarfianniit ilinniartitaanermut suliffeqarnermullu ikaarsaariarneranni sulissunneqarlutillu suleqatiginerat qulakkeermallugu. Suliniutit nutaat siunertaraat inuusuttut meeqqat atuarfiannit aninermi kingorna ilinniaqqilinngitsoortartut ikililerniarlugit allatulluunniillu iliuuseqarluni suliffeqarnermut peqataatillugit aqutissiukkumallugit.

Aappasaanik Naalakkersuisut siuliani taaneqartutut pissuseqartumik ilinniarfissamik ajornartorsiuteqartarnek suliniuteqarfigiumallugu aallartippat. Naalakkersuisut sulisitsisut kattuffii suleqatigalugit aqutissat nutaat nassaariniarsaat sulilluni allatulluunniit ilinniarfissat amigaataanerat millilerumallugu, imaluunniit sulilluni ilinniarfissanik amigaateqarneq anigorumallugu. Ilaatigut oqallisigineqarpoq:

- inuusutissarsiutitugit ilinniarfiit ilinniartoqarsinnaanikkut pisinnaasaasa annertusinissaat qulakkerniarlugu ilinniarnert ingerlanerat sivikillillugu assassornikkut ilinniakkanik ingerlatsisinnaatitaaffiit iserfigitissinnaanerat piviusunngortikkumallugu,
- qitiusumik ilinniarfinni taakkunani ilinniartitsisuusartut atugassaasa pitsaanerulernissaat qulakkeerniarlugu,
- suliariumannittussarsiuussisarnernut malittarisassat allanngorlugit sulisitsisut ilinniartunik tigusinissaannut kajummissuseqalersillugit,
- minnerunngitsumillu pisortaqarfiit immikkoortortaanni ilinniartuusartut amerlillugit.

Naalakkersuisut siunissami qaninnerpaami aalajangiiviginiarparpaat suliniutit suut piviusunngortinneqassanersut.

Naalakkersuisut Nunat Avannarliit Siunnersuisoqatigiit nunani avannarlermiut ataatsimoorlutik inuusuttut suliffissaaleqinerannik akiuiniarnerminni periuuserilersaagaat suliffeqarnermillu ineriartortitsinissaq utaqqimaarpaat, taamalillutik nunarsuarmut tamarmut siaruaattumik unammillerneq peqataaffigilluarsinnaassallugu piareersimajumallutik.

Aammali naqissusertariaqarlugulu erseqqissartariaqarparput inuusuttunut 25-t inorlugit ukiulinnut neqerooruterpassuaqarnera. Pingaernerpaamik atuupput arlalitsigut sammiveqartunik ilinniarfissanik qinigassarpasuit, Piareersarfiit ilanngullugit, ilitsersuinikkut pikkorissaanikkullu qitiusuusoq inuusuttut ilinniarnerminnut pikkorissaqinnermullu ilitsersorneqarnermut toqqammavissaat.

Suliffissarsiuussisarfiit pisinnaasanik pisinnaatitaanernillu taavalu suliffeqanngitsut sulisinnaassuseq aallaavigalugu naleqqussaavigineqarnermillu suliaqarlutik piviusunngortitsinernik suliaqaleruttorput, taamaalilluni piginnaasat periarfissallu erseqqissisikkumallugit.

Tamanna tunuliaqutaralugu Naalakkersuisut inassutigissavaat siunnersuut itigartinneqassasoq.